

Date – 03/10/2025

Time - 18:30 Hrs

HEADLINES (EVENING)

1. Chief Minister Pu Lalduhoma'n Thalaiten zirna an uar a tul thu sawiin ruihhlo laka fihlim bakah hmasawna avanga thil inthlakthlengna dawnsawn thiam a tul a ti.
2. Education Minister Dr. Vanlalthlanan zirna sang zawkah Mizoram chu che thain, school education lamah Mizoram chu ramchhungah a tichhe berte zingah a tel a ti.
3. Union Finance Minister Nirmala Sitharamani chuan ramchang Viksit Bharat thleng turin ram sum dehchhuah GDP chu zaa 8 anih a ngai a ti.
4. Union Cooperation Minister Amit Shah-a chuan India in bawngnhnute kaihhnawih ei leh in a tharchhuah chu kum 11 chhungin zaa 70 in a pung a ti.

<><><>

CHIEF MINISTER

Chief Minister Pu Lalduhoma'n Thalaiten zirna an uar a tul thu sawiin ruihhlo laka fihlim bakah hmasawna avanga thil inthlakthlengna dawnsawn thiam a tul thu a sawi.

Pu Lalduhoma hian vawiin khan a bial Buangpui Community Hall-a Buangpui Branch YMA kum 50-na (Golden Jubilee) lawmna chu a hmanpui a, Buangpui mipuite lawmpuina hlanin YMA chu pawl zahawm leh thianghlim, mi zawng zawng lenna a ni tih a sawi.

Chief Minister chuan Thalaiten zirna an uar a tul thu sawiin ruihhlo laka fihlim hmasak a pawimawh a ti a, hmasawna lo thleng zelin a ken tel inthlakthlengna lo dawnsawn thiam a tul thu a sawi bawk.

Pu Lalduhoma chuan YMA chu Mizo hnam huikhawmtu, kristianna pen bosan si lo va Zo nun ze mawi chhawm nungtu leh zirtirtu a ni a ti a, Thangtharte hnena zo nun ze mawi zirtirna leh kaihhruaina chu a kalpui tur a ni a, tlawmngaihna te, aia upa zahna te, tanpui ngaite tanpui chu chhawm nun zel a pawimawh tih sawiin hnam zia awnham leh tihhmasawn kawngah tha thlah loa tan mar a pawimawh thu a sawi.

Buangpui YMA hi kum 1975-ah din a ni a, Tunah hian in 114 awmin mihring 518 an cheng mek a, an zinga mi 358 hi YMA member an ni.

<><><>

HEALTH

Rampuma Sawrkar damdawi in tha tehnaah Primary Health Centre pathum a tling thar a, heti hian Mizoram chhunga Health and Wellness Centre -PHC 57 target zinga 34-in National Quality Assurance Standard (NQAS) certificate an nei tawh a ni.

National Health Mission, Mission Director Dr. Lily Chhakchhuak chuan India rama sawrkar damdawi in tha bik tehna, National Quality Assurance Standards (NQAS)-a tling thar Phullen PHC, Hnahlan PHC, leh Reiek PHC te hian 100-a 90.68, 93.36, leh 90.76 te an hmu a tih a sawi. Reiek PHC hi Aspirational Block Programme (ABP) hnuaia mi niin ABP hnuaiah hian target pasarih awmin State certified 5 (panga) leh National certified 4 (pali) an awm mek a ni.

Health Minister Pi Lalrinpuii pawhin lawmawm a tih thu sawiin, heng NQAS certified sawrkar damdawi in te hi mipuite'n an hman tangkai thiam a pawimawh hle tih a sawi a ni.

Heti hian Mizoram chhunga Sawrkar damdawi in 47 te chu NQAS national certificate nei tawh an ni a. Tunah hian sawrkar damdawi in 19 leh HWC Sub-Centre 21-in state level certificate nei mekin national certificate result nghak mek 4 an awm baw k a ni.

National Quality Assurance Standards (NQAS) certified damdawi in te hi endikna chhawng thum paltlang an ni a, a tawp bera endikna an hmachhawn hi National External Assessment a ni a, state pawn atangin Assessor an lo kal thin a ni. Hetah hian 100-70 an hmuh chuan certified an ni chauh thin. Heng certified tawh damdawi inah te hian natna darh thei ven kawngah te, thawktu zawng zawngte an hna bil an thiamna te, an level zelah enkawl na an pek that dan te, a thlawna enkawl na leh damdawi pek te, damdawi in faina leh dik taka damdawi in bawlhhlawh sawngbawl te, hawihawmna leh a chhehvel vawnfai kawngah te, environment vawn that kawngah te endik an ni.

<><><>

NATIONAL WILDLIFE WEEK

‘National Wildlife Week’ chu vawiin khan Environment Forest & Climate Change (EF&CC) Minister Pu Lalthansangan Assembly Conference Hall ah a hawng a,

Minister Pu Lalthansanga chuan ram puma ramsate humhalhnan sawkar laipuiin 3rd National Wildlife Action Plan 2017-2031 a duan thu tarlangin Mizoramah pawh he plan hi tha taka kalpui a pawimawh a ti a. Mihringte leh ramsate chu an inmamawh tawn avangin n awmna theuhah inrem taka cheng za a, ramsate tana hnaw k lo zawnga mihringte pawh awm thiam a ngaih thu a sawi a ni. Aizawl Western Bypass Road laih mekah pawh Forest Department chuan ramsate thlamuang taka an awm theih a ngaih pawimawh thu a sawi a. Wildlife Protection Act 1972-in a humhalh ramsate kah hi dan anga na taka hrem theih a nih thu tarlangin Mizote pawhin rannung kah leh sa pelh sim a pawimawh thu a sawi baw k a. Ramsate leh nungchate humhalhna tura sawrkarin dan a siam hi zawm tum theuh turin kalkhawmte a chah baw k a ni.

National Wildlife Week hawnna inkhawmah hian ramsa humhalh pawimawhna mithiam ten kalkhawmte an zirtir a, Minister chuan ‘Illustrated Poster of Rengdil Lake Biodiversity’ a tlangzarh a ni.

Serchhip ah chuan, Nungchate humhalh hapta hawnna hi C.Lalchunglura Principal kaihhruaiin Brilliant Higher Secondary School New Serchhipah neih a ni a. Thenzawl DFO Dr R.Lalnung renga chuan- Mihring leh nungchate hi cheng ho tura khuanu duan an nih avangin intibuai lova chen ho zir a ngai a ti.

Ramsa tihhluma sum hmuhna tura an taksa peng lak te chu Dan pakua lai hmangin a chung thu ngaihtuah theih a ni a, Kazirangaa Samak beitude pheih chu kah nghal theihna dan a awmsa reng a ni a ti.

Serchhip Dist Hony Wildlife Warden Pu C.Lalhminghlua kaihhruaiin he hun hmangtute chuan thu tiam an la a. Thing leh mau, nungcha tinrengte chu Pathianin a duh taka a siam, mihringte nena inlungual tak leh in mamawh tawna khawsa ho tur a khawvel a a dah an ni a, Ramsa leh sava tin rengte leh rawmngaw ti chereu tu an nih loh tur thu an tiam a ni.

<><><>

EDUCATION MINISTER

Education Minister Dr. Vanlalthlanan lamah zirna sang zawkah Mizoram chu che thain, school education lamah tun hnaia Ministry of Education-in Performance Grading Index 2.0 report a tlangzarhah Mizoram chu a tichhe berte zingah a tel a ti.

Vawiina Aizawl City College Joint Students' Union (ACCJSU) kum 25 tlin lawmna hun chu Lalthanhawla Auditorium-a a hmanpuinaah he thu hi sawiin Minister chuan tun hnaia National Institutional Ranking Framework (NIRF) ranking-ah Mizoram University (MZU) leh Pachhunga University College (PUC)-te thleng sang mah se school education lamah tun hnaia Ministry of Education-in Performance Grading Index 2.0 report a tlangzarhah Mizoram chu a tichhe berte zingah a tel a ti a. All India Service-a inziak tling kan neih lohna a rei tawh thu tarlangin, he’ng harsatnate leh zir laite dawmkan dan tur zirchianga, zirna siamtha turin NITI Aayog nen an indawr tih a sawi a ni.

Minister chuan zirlaite hamthatna atana sawrkarin hma a lakte tarlangin, kum tam tak luah theih loh NIT Mizoram Lengpui Campus chingfel turin cheng vbc .10 an pek tawh thu leh forest clearance nghah mek a nih thu te, Mizoram Engineering College-ah pawh industry mila syllabus neih an tum thu te, State University atana Registrar leh Vice Chancellor lakna tur search committee din chhoh a nih tur thu te a sawi a. An sawrkar hnuah college sakthatna tur PM-USHA leh SASCI atangin cheng vbc. 100 chuang an dawn tawh thu te, Aizawla college-ho insem tur cheng nuai 1000 vel an dawn thu te, college fee ennawn mek a nih thu te a sawi a.

ACCJSU chu kum 2000-a din a ni a. An silver jubilee lawmna pualin intihsiakna hrang hrang huaihawt a ni.

<><><>

LUNGLEI

Lungleia Dist Agriculture Office a thawktute chuan vawiin khan khaw hrang hrangah lo neitute nen Sazu hrai hna an thawk a Mamte khua erawhin Sazu hrai an duhlo.

Dist Agriculture Office Lungleia thawktute hi Pu Vanlalfela ADAO hova thawk chhuakin Tawpui North-I, Mualcheng South, Thingfal, Mamte leh Thlenganga lo neitute buh Sazu in a seh chhiat sakna hmunte tlawhin Sazu in an buh leh thlaite a seh chhiat zel loh nan lo neitute nen hian tur hmangin Sazu hrai hna an thawk a heng khua an tlawhah te hian tunhnai khan Sazu puangin tharrang buh thahnem tak an eichhe tawh a ni.

Hetiang a nih avang hian Dist Agriculture Office Lungleia thawktute chuan a hmunah hian kalchilhin an buh leh thlai Sazu in a ei chhiat dan an enfiah bakah Sazu tur hmanga hrai hna lo neitute nen an thawk nghal a ni.

Hetihlai hian Mamte khua leh Thlengang khuaa chhungkaw pasarih te tih loh chuan buh seng a hun mai dawn avang leh riak luta buh seng angaih dawn avangin lo lama an ei leh in tur thlai leh tui tlan tur laka an him zawk theih nan buh sehtu Sazu hrai chu tha an tilo tih Agriculture Department thawktute hi hrilhin Department a thawktute pawhin an duhlo chung chu an tih luih theih a niloh thu an sawi a ni.

Mamte khuaah hian In 134 vel awmin chhungkaw 47 velin thlawhhma an la a chhungkaw 7 te buh chu Sazu hian a seh chhiat sak tawh a, Thlengang khuaah hian chhungkaw 50 awmin chhungkaw 40 in thlawhhma an la a, chhungkaw 7 te chauhin Sazu hrai hi an duh a Agriculture Deptt a thawktute hian Sazu an hraina turte chu ruah laka him tura dah dan an zirtir nghal a ni.

<><><>

RASHTRIYA POSHAN MAAH

Nu leh naupang tana chaw tha inzirtirna, Poshan Maah chu Mizorama Anganwadi Centre hrang hrangah September thla chhung khan hman a ni.

Poshan Maah chungchanga Akashvani Aizawl in a kawmnaah, Mizoram Women and Child Development Department Deputy Director Pi Sailopari chuan Poshan Maah chu sorkar laipuaia Ministry of Women and Child Development in a duan a ni tih sawiin, he programme in a tum ber chu naupang than thu, naupang an san zawng en a cher leh lutuk, naupang thang tha lo, leh thisen tlakchhamna tihtlem te a ni a ti a, September thla chu ei leh in chungchanga inzirtirna beihpui thlakna thla a nih angin Mizoram hmun hrang hrangah pawh Poshan Maah hman a ni a ti a, Pi Sailopari chuan Mizoram khaw hrang hranga Anganwadi Centre-ah naupang kum 3 atanga kum 6 inkarte hnena inzirtirna tur, thiam bul tanna bu siam a ni a, eitur leh damdawi tha te an sem bawh thin tih sawiin, nu pum chhung a naute a insiam atanga kum 2 a nih thleng chu mihring huna hun pawimawh ber a ni a, hemi hunlai hian nu pawhin iron leh calcium tiamin damdawi leh eitur tha a ei a pawimawh hle a, naute a lo piana thla 6 a nih thlengin nu hnute tui chauh hmanga chawm chu a tawh a ti a, thla 6 a tlin hnu atangin chaw pangngai thei leh thlai her dip eitur a tha hle tih a sawi.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

UNION FINANCE MINISTER

Union Finance Minister Nirmala Sitharamani chuan ramchang Viksit Bharat thleng turin ram sum dehchhuah GDP chu zaa 8 anih a ngai a ti. Vawiina Kautilya Economic Conclave New Delhi-a a hawннаah he thu hi sawiin Pi Sitharaman-i chuan ram chhung sum dinhmun chu a tlo a, chawl loin eibar dinhmun a thang chho zel a ti a. Khawvel sum dinhmun tlahniam thut pawh paltlang theiin a awm tih a sawi a. Ram hrang hrang inkar a buai chho mek a, hei vang hian khawvel ram hrang hrangte inzawmkhawmna pawlte chu tihchak a tul thu a sawi a ni..

<><><>

VIETNAM

Vietnam-a Typhoon Bualoi avanga thi zat chu 51 an tling tawh. Sawrkar thuneitute sawidanin ruahsur nasa leh tuilian avangin mi 14 chin hriatlohin an bo a. Mi 164 in hliam an tuar a. Thawhtanni atang khan Vietnam hmar lamah Typhoon Buailoi hi thawk a. Tuipui chim chin nasa taka ti sangin thli leh ruah nasa takin a thawk a ni..

<><><>

DAIRY

Union Cooperation Minister Amit Shah-a chuan India in bawngnute kaihhnawih ei leh in a tharchhuah chu kum 11 chhungin zaa 70 in a pung a ti. Vawiina Haryan-a Rohbak-a Sabar Dairy plant a hawннаah he thu hi sawiin dairy chu khawvela eizawннаa thang chak ber pawl a ni a ti a. Sabar Dairy plant chu cheng vaibelchhe 325 hmanga din anih thu sawiin bawngnute kaihhnawiha eizawngten an chhawr tangkai dawn hle a ni a ti.

<><><>